

ACORSICA HÈ SEMPRE STATA UN CAPATOGHJU PER L'INVASORI. L'ISULA HÈ STATA SCUZZULATA À LONGU À I SÈCULI TRÀ MISÈRIE È RIVOLTE. A SO STORIA HÈ RICCA È SERIA UN BELLU RIFERIMENTU PÈ A NOSTRA GHJUVENTÙ... S'ELLA ERA AMPARATA.

Perch'è l'8 di dicembre festa di a Nazione Corsa?

Di 1725, a Corsica si rivolta contr'à Gènuva è si mette sott'à a prutezzione di a Santa Vèrgine Maria. Hè cusì chì l'8 di dicembre, festa di a Madonna, ghjornu di a so nàscita, fù dettu ghjornu di a Nazione è festighjatu tutti l'anni cum'ellu si deve, cù canti, pistullettate è fucaroni incesi in cima à i monti chì si vedianu da paesi à paesi.

Ma era una scelta più chè religiosa. Era dinù vuluntà pulitica. Di fatti, à quell'èpica, a Corsica vullia attaccassi a prutezzione di u Papa, putenza pulitica è militare. A Francia s'upponia à Roma perchè era sott'à a duminazione di l'ordine duminicanu. Invece chì Roma seguitava l'ordine franciscanu ch'unurava a Santa Vèrgine è a dicia concepita *Immacolata*. Franciscani, ci n'era assai ind'è à nostr'isula, tandu era lògicu per a Corsica di seguitalli. I patrioti corsi pensavanu chì pigliendu ssu versu chì li era naturale, puderianu avè dinù i favori di u Papa s'ellu ci era u bisogno. Hè cusì chì a Madonna fù detta «Regina di a Corsica», u Diu vi Salvi Regina fù pigliatu cum'è innu nazionale è l'8 di dicembre fù pruclamatu festa di a Nazione. È durante à sèculi, i Corsi, ancu puru sott'à duminazione genuese eppò dupu francese, anu festighjatu l'8 di dicembre cum'è a so festa.

A maiò parte di i Corsi d'oghje ùn cunnòscenu a so storia. Quella, ùn hè micca amparata. I libri di storia esistenu ma pochi i lèghjenu per disgrazia. Uni pochi di Corsi dinù ùn parlanu più a so lingua. Uni pochi ùn la lèghjenu micca, è certi torna ùn la capiscenu più. I studii di l'Insee sò belli è boni, ma u fattu ghjè chì a nostra lingua hè una lingua chì si ne more, è oghje, campemu a lingua è cultura imprestate. S'ellu hè unuratu u Babbu di a Nazione corsa in America o in Inghilterra*, à a Francia li si pare megliu d'ùn fà sapè a grandezza di quell'omu. I libri di storia di l'Educazione Naziunale francese ùn còntanu nunda di e so opere è di u so rinommu in core di u *Sèculu di i lumi*. S'ellu si sà qualchi pezzatelli di storia, s'ellu si cunnosce è si festighjèghja, ancu puru di manera scarsa, a festa di a

Nazione, ghjè à i nazionalisti corsi ch'omu u deve.

In un mondu à porte spalancate duve a vitezza è i mèdia cummàndanu, hè difficile di luttà contr'à l'uniformisazione di e manere di pensà. Raddii, televisioni, ghjurnali ci annèganu d'altre lingue è modi di fà è i nostri zitelli sunnièghjanu d'*Halloween* è di *Star Academy*... U mèritu tandu di i nazionalisti hè grande d'avè rinvivitu quelli puntelli di storia cum'è l'8 di dicembre, o cum'è quello di Ponte Novu. Ammentassi di l'8 di dicembre, ùn hè un ritu arcàicu, fora di usu. Ghjè assai ùtile bellu cuntrariu, permette à i più giovani d'imparà d'induve elli vènnenu è li permette di custruiscesi megliu. Ghjè un magiu à l'antennati ma dinù un attu di memoria cullettivu chì ci addunisce, Corsi di nàscita è Corsi d'adduzione. A lingua, a cultura, a storia sò strumenti d'integrazione è di cessione suciale, sò lee di a società ch'aiùtanu à campà.

Per quessa chì ghjè impurtante di risponde à l'iniziative lampate quindi è



Fiure di a Nazione corsa.

culandi per festighjà l'8 di dicembre. U CAR dumanda d'appicà una bandera à e finestre di e case, studenti, associi o cumitati nazionalisti di Balagna, di Gravona o d'altrò chjāmanu elli à aduniscesi per sparte quellu ghjornu di fratellanza. L'inviti sò lampati, spartiteli ancu voi. ●

* Sette città d'America pòrtanu u nome di Paoli City o di Corsica... è in Westminster, in Londra, una stàtua unureghja a memoria di u Babbu di a Nazione corsa.

F.G.

Qualchi appuntamenti

Una casa, una bandera

U Cumitatu contr'à a Ripressione chjama i Corsi à mette una bandera in finestra l'8 di dicembre per ramentà è salutà u ghjornu di a festa di a Nazione.

Chjama di u Cumitatu nazionalistu di a Gravona

Quist'annu cumu dipoi tant'anni i nazionalisti anu da festighjà l'*Immacolata Cuncizzioni* in ogni scorru di Corsica.

Festa riligiosa, di a fedi cristiana di i nostri antenati è festa di a Nazioni dipoi u 1735 chì da suchju à sta fedi patriotta d'erì, d'oghji è di dumani. Quist'annu demu appuntamentu à tutti in Auccia ghjovi l'8 di dicembre in caffè indè «Charlot» toccu 8 ori in giru à un tavulinu pà una veghja di cuncolta, di spartera è di cumunioni.

U Cumitatu lisulanu invita

Cume tutti l'anni u cumitatu lisulanu in L'Isula Rossa invita à una serata di canti è di fratellanza, cù pulenda è figatelli... pè festighjà a Nazione corsa è a Vèrgine Maria, patrona di a città.

Appuntamentu hè datu, ghjovi sera Piazza Paoli.

Bandera è veghja in Conca

I Purtivehjacci elli si ritòrvanu in Conca in giru à l'associu A Punta di l'Ortu chì tutti l'anni fàcenu festa ancu elli. A cummemurazione hè principiata u 3 di dicembre duve l'associu hà stesu una bandera maiò nant'à a muntagna di a Punta di l'Ortu. A bandera face 10 metri nant'à 15. Ghjovi, l'8 di dicembre, à 4 ore dopu meziornu, ci serà una messa nustrale per l'*Immacolata Cuncezione* à a ghjesgia di Santu Stèfanu. À 5 ore, dopu à a messa, s'incenderà a bandera è tutt'ognunu si darà appuntamentu u sàbatu 10 à 8 di sera per una veghja tradiziunale intornu à u focu. Canteremu cù l'Attrachju è uni pochi d'altri sunadori è cantadori. Pulenda, figatelli, panzetta è climantini seranu rigalati. Appuntamentu hè datu fora in giru à u focu s'ellu face bellu tempu o in a sala di i festi s'ellu hè gattivu u tempu. ●